



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

Kim-i China aser Russia den
tesendaktep akangshitsü nangzük

Pele-i linük atema goal timtiba indaktsür
aliba record Neymar-i ajatetogo



VOL. XX NO. 329 (ADOK 329) DIMAPUR AMUNGNÜ (SUNDAY) RONGJUI (SEPTEMBER) 10, 2023 ₹ 5.00

CM Rio-i NE shishilembartem conclave lapoktsütsü

Dimapur, September 9, 2023 (TYO): Nagaland Chief Minister Neiphiu Rio-i mezümbuba North Eastern States Chamber of Commerce & Industry Business conclave lapoktsütsü.

Iba sentong ya September 18 nungi 20 tashi Niathu Resort, Chumukedima nung agitsü.

Confederation of Nagaland Chamber of Commerce & Industry (CNCCI) ajanga

ayongba sentong nung Northeast state tem nungi sendaktepa alir ajaki shilem agitsü.

“Iba conclave ajanga action plans tajung kar yanglutsü nükjidong lir. Northeast ya shishilembadak tuluka lir aser asenoki lenmangtem bushiteptsüla aser kati ka yaritsüla” ta CNCCI, chairman, Dr. Khekugha Muru-i osangbener den jembidang ashi.

Kangpokpi nung Kuki nungeri Black Day mamongtsü

Imphal, September 9, 2023 (Agencies): Kangpokpi District nung aliba Kuki nungeri September 13 nü wako tanak matsüketsü aser süoshi tanak mesobutsü telemetba agiogo.

Iba anogo dang Sahit Ni ta ajar aser Kuki nunger Black Day ta tetshir.

Kuki nunger lokti lennirtem aser shisashirtem Kangpokpi District Headquarters nung

Sahit Ni atema senden ka amen. Iba senden ya Sadar Hills Chiefs' Association Kangpokpi District-i yimjung aser telongjem ajungkettsü nükjidong nung ayongzük.

Iba senden nung September 13 nü “Prayer Day for Peace” ta ser amongtsü lemet.

Senden nung adenertemisa “Black Flags” mamshitsü aser süoshi tanak masemtsü bangjemtep.

Euphonic Patkai PCC-i Battle of the Bands takok angu



Kohima, September 9, 2023 (TYO): ‘Battle of the Bands’ nung Patkai Christian College, Chumoukedima ajanga tematiba takok nguogo.

Iba tetoktepba ya college aser higher secondary kaketshirtem atema Department of Youth Resources & Sports, Nagaland-i Task Force for Music & Arts (TaFMA) den yaritepa ayongzüka agiogo.

Nagaland nung college aser higher secondary kaketshirtem ajanga tentetba band 37-i audition rounds nung shilem agi aser parnok 16 Live Round atema shimteta tanü RCEMPA Jotsoma nung iba tetoktepba agi.

Final round nung Euphonic band-i ‘With this heart of mine’ ta ser original ken ka aten aser parnoki mezümbuba jenjang takok ngua Rs 1 lakh den kulikaket nguogo.

Stereo Groove (Clark Theological College, Mokokchung)-i tanabuba jenjang aser The Hope Maverick (Hope Academy, Chumoukedima)-i tasembuba jenjang takoktem

angu. Stereo Groove-i Rs 75,000 aser Hope Maverick-i Rs 50,000 senpettem agizük.

Maneni, Front Fern (Queen Mary HSS, Mokokchung), Wangngai Band (Wangkhaio Government College, Mon), The Cassiopeiae (Holy Cross HSS, Dimapur), Call of Sublime (Tetso College, Dimapur) aser DPSD (DPS, Dimapur) ajanga consolation prizes angu aser parnok band shiai Rs 10,000 senpet agizük.

Round of 16 nung shilem agirtem- The Apprentices (Bautung GHSS, Longleng), The Young Prodigies (St John HSS, Tuensang), Silver Bullet (Zisaji Presidency College, Kiphire), Xaverite Band (St. Xavier College, Peren), D’escape (G. Rio School Kohima), Rythmic Band (St. Joseph’s College Jakhama Kohima), The Orphic Band (Baptist College, Kohima) aser Rustic Harmony (Baptist HSS, Tseminyu).

Iba tetoktepba nung tetendangertemji Moanungsang, luli aser Alobo Naga nunger liasü.

G20 Summit: India-Middle East-Europe Mega Corridor sangoktsü



Partnership for Global Infrastructure Investment (PGII) aser India-Middle East-Europe Economic Corridor sentong nung (abelen nungi) European Commission President Ursula von der Leyen, Saudi Arabia Crown Prince Muhammed Bin Salman, Prime Minister Narendra Modi aser US President Joe Biden nunger külemi agiba noksa angur. (New Delhi, September 9)

New Delhi, September 9, 2023 (Agencies): India, United States, Saudi Arabia aser European Union ajanga Honibarnü India-Middle East-Europe shipping & railway connectivity corridor yanglutsü atema tenangzüktep agiba osang metetdaksüogo.

Iba mapatong tulu indang osang ya G20 Summit mapang Prime Minister Narendra Modi-i metetdaksü. Iba mapang PM Modi den US President US Biden, Saudi Arabia Prime Minister Mohammed bin Salman aser EU lennirtem liasü.

Iba otsüsütsü mapatong nung India, UAE, Saudi Arabia, EU, France, Italy, Germany aser US dena lir.

“Ni nenok ajak iba sentong nung pelashishia agizük. Kü medemer President Joe Biden den külemi iba senden nung menden shilemagiba atema pelar. Tanü asenoki iba otsüsütsü aser tongtipang tenangzüktep renemba angur. Iba ajanga tarutsü anogotem India, South Asia aser Europe tsüngda rongsenketzung sendakteptsü” ta PM Modi-i ashi.

“Iba tenangzüktep ajanga alima nung connectivity aser sustainability len anitsü. Iba connectivity corridor nung shilem agiba lennir ajak nem

tenüngsang agütsür” ta pai ashi. “Meimchir liyonga aoba nung connectivity aser infrastructure ya terenlok angutsü tamendakdak lir. India renlokba mapang iba onük atema tongti süa bilemogo” ta PM Modi-isa ashi.

“Iba ajanga asenoki India renloktsü atema tamendakdak takang ka yanglur. Teyariteper tajung ka ama India-i Global South linüktem nung railways, energy aser technology partnerships nung mapatong aika tenzükogo” ta paisa ashi.

Linük balala tsüngda sendaktepba ajanga shishilembaba nung dang masü saka kati ka dak temulung tali lemteper, ta Modi-isa shisem.

“Iba tenangzüktep ajanga low aser middle-income countries ajangzüktsü aser alima rongsenketzung nung Middle East-i tongti shilem agitsü. Iba mapatong ajanga kongshiba linüktem dang dang masü saka alima ajangzüktsü” ta White House Deputy National Security Advisor Jon Finer-ia ashi.

“Iba ya Railway project dang masü saka shipping and Railway project ka lir” ta paisa ashi.

“Iba ya tenangzüktep tulu ka lir. Ni PM Modi dang pelar. Iba G20 Summit indang alizüngji

One Earth, One Family, One Future lir” ta US President Joe Biden-i Partnership for Global Infrastructure Investment (PGII) aser India-Middle East-Europe Economic Corridor programme nung jembidang ashi.

“Iba senden nung sangdongba Economic Corridor project inyaka aotsü yongyaa atar. Iba tongtipang corridor yanglutsüba sentong nung yariteper ajak dang pelar” ta Saudi Arabia Crown Prince Muhammed Bin Salman-isa metetdaksü.

“European Commission den külemi onoki iba mapatong nung yariteptsü nangzük. Iba ya Asia nungi Middle East adena Europe tashi kanga dang tongtipang mapatong ka lir. Maongka aika agütsüba den nübortem sendakteptsü” ta France President Emmanuel Macron-ia ashi.

“Mapatong tulu aika asangsang nung ataloker. Tanü onoki mapatong ana sayar. Mezümbuba nung India-Middle East-Europe economic corridor. Iba ajanga India, Arabian Gulf aser Europe indangindanga sendakteptsü. Tanabuba mapatongji Trans African Corridor lir” ta European Commission President Ursula von der Leyen-ia ashi.

Kohima nung market complex 2 mitsü küma rongdok

Kohima, September 9, 2023 (TYO): Kohima nung market complex ana- Peraciezie Market aser AV Market mitsü küma rongdokogo.

Tanep High School junction Kohima anasa kitsükkirong lendong atalokdang market complex ana rondokba den Vishal Mega Mart aser North Hill Arcade nung anameta aliba dokantem kar raksa.

Tanep 2:00 ako meta dokan ka nungi mi adokba sülen complex ajunga mitsü küma rondok ta osang angazük.

Tanep 2:30 ako meta Fire & Emergency Services Department-i osang angashi aser iba sülen North, South o

Chiephobozou fire stations nungi mi ensepertem tesem tonga ao.

Tanep 5:00 ako tashi nung ang parnoki mi enseptet saka tanü anüngdang tashi nung ki arongdak nungi mokozü adoka liasü.

Iba lendong ya short-circuit ajanga adok asütsü akok ta temulung meleme bilemer saka kuli jangjatsü atema bushisüngdang südar.

Kitsükkirong lendong nung sen crore aika alangba rongdokogo saka nisung asüba osang kecha mali. Iba anasa alir kibong pezü talidak maka kümogo.

Peraciezie Market aser AV Market nung kitemji süng agi

yangluba teimba liasü.

Kohima QRT, Kohima Village Youth Organisation, Lhisemia Youth Organisation, Peraciezie Youth Organisation, Peraciezie Baptist Church aser kiyongertemi iba mapa nung yaritepogo, ta High School Traders Union ajanga metetdaksü.

Kohima District Disaster Management Authority (DDMA)-ia spot verification inyak aser takoksa asadangogo. DDMA-isa ki kiburtem aser talidak maliba kibongtem nem senotsü teyari agütsüogo.

Ano, Kohima Bible College anasa Khikha nunga tanü nikongdang nija ki ka mitsü küma rongdokogo.

Mokokchung Town Lanur Telongjem office semzükogo



(Mener alir tabelen nungi tachichi): Rev Dr Bendang Longkumer, Tir Imnaonen Pongen, General Secretary Imkongchuba Pongen aser Alemla (ki kibur) den tanga MTLT ketdangpurtem aser sanenluden züngsemtem Mokokchung Town Lanur Telongjem office semükba sülen tangokba noksa nung angur.

Mokokchung, Rongjui/September 9 (TYO): Kanga dang nüngdaka aliba Mokokchung Town Lanur Telongjem office September 9 nü Artang Baptist Arogo pastor Rev. Dr. Bendang Longkumer-i bendanga agüja sarasademja semzükogo.

Office tasenbuba nung tir takdang ka, General Secretary

cum media & publicity office ka, Conference Hall aser foyer ka densema lir. Iba office ya Arkong Ward nung amenoka lir. RTO, Mokokchung indang office Kumlong ward-i belenba sülen ki yanglushir MTLT indang office amenokogo.

Office tasenba meshiteta sarasadem masü tsüngda Pastor, Rev Dr Bendang

Longkumer-i, nüburttem atema inyakba mapang teti Tsüngrem tama südaktsütsü ajungshia liasü. 1Korent 10: 31 nung ajemdaker jembiba mapang Dr Bendang-i, Mokokchung nung aliba lanurtem dang mapa ajak Tsüngrem sentsüwanshi atema inyaktüsü ajungshia liasü. Paisa, Philipi 4:13 dak ajemdaker MYLT dang Tsüngrem dak

nungi tashi agitsü ajunshi, ajita asünungdang nüburttem atema inyakba mapang parnok tasü ita ochi nung nokdaktetsü, ta ashi.

Sentong nungsa o tatska jembiba mapang mezüngbuba MTLT tir Imkongsanen Imchen-i, iba lokti tentetba indang puti otsü lemsatepa liasü. Pai ashiba agi, MTLT tenzüklibo tetsükdaktsü aika ajangshia liasü saka tsürepurtem sarasadem aser MTLT züngsemtemi maneni nongita yariba ajanga iba lokti tang tashi mesamai inyaksangshia arudar.

Paisa, MTLT atema mejeta office ka lapoktsü asoshi jenjang tajung agiba atema ketdangpurtem nem tenüngsang agüja liasü. Maneni pai MTLT ketdangpurtem dang nüburttem ajangzükdaktsütsü asoshi inyaktüsü mezüngbuba asütsü, tasü aittsü, ochi asoshi

nokdaktsü aser nüburttem terelok asoshi inyaksangshitsü ayongzüka liasü.

Lokti pela agizükba o jembiba mapang MTLT tir, Imnaonen Pongen-i, office takok ngua lapoktsütsü asoshi shirnokisa teyari agütsüogo parnok ajak dang kanga pelaba lemsatepa liasü. Paisa, office yanglushitsü atema MTLT züngsemtem aser nüburttem shirnokisa tenla tajung agütsüogo parnok ajanga dang kanga pelaba lemsatep. Maneni pai ali kibur Mr & Mrs. L. Yanger Aier dang iba kim amshitsü atema MTLT nem temelaba agütsüba asoshi kanga pelaba lemsatepa liasü.

Iba sentong ya General Secretary Imkongchuba Pongen lenisüba nung agi aser Assistant General Secretary Moarenba-i Tsüngrem temaotsü meshizüka sarasadema liasü.

St. John's School Changtongya nung computer lab amenok



12 Assam Rifles Commandant, Col. Rahul Gurung-i St. Jogn School Changtongya nung computer lab lapoktsüba mapang tangokba noksa nung angur. Mokokchung, 9th September, 2023

Mokokchung, 9 Sep (TYO): Tanü putu nung computer education-ji tongtibang angateta kaketshir shia nem computer shisatsü angazükdaktsütsü nükjidong nung Sep 9, 2023 nü St. John's School Changtongya nung computer lab ka amenokogo. Iba computer lab-ji 12 Assam Rifles Mokokchung, Commandant, Col. Rahul Gurung, Kirti Chakra-i lapoktsü.

Col. Rahul-i sentong nung jembidang, tarutsü India limaji nenok kaketshirtem ya lir, anungji, nenok taküm nung langka mesüra langka kabo pungmangtsüla, kechiyong asenoki dang merangra aser shitak lenmangi ora taküm nung tamakoktsü kecha mali, ta tayongzüka ka agütsü.

Pai India lima nüngtugu nisung kar tetshia ashidang, taoba India President, Dr. A. P. J. Abdul Kalam-i tarutsü India lima atema bilema inyak aser tanü pa pungmang asangsang kuma aoba angur, yamaji tang India Prime Minister, Narendra Modi taküm ya jenjang tila ka nungi ajungketba lir, aser business tetsüti Ambani'er kibong ya tila ka nungi dang tenzüka tanüba alima nung takartiba rongnung züngsem, anungji, kaketshirtemi maneni pungmangtsüla aser pei taküm nung nükjidong tejangja ayutsüla.

Nükjidong ayuba den maneni

meranga azüngtsüla, alima nung maongka jenti lir, anungji, temulung ajema malitsüla aser marendaktsüla. Tangar amaji asenokia kasa angazüktetsü aser tongtetsü, ta paisa kaketshirtem ajungshi. "Küm 10 sülen nenok rongnung nisung karbo pei taküm nung jenjang tajung ajangzükteter alitsü imlar aser ibaji reprangi ni arutsü", ta paisa shisem.

Tesayur mapa ya tamaren mapa ka lir, ibai lokti nem bendanga agütsüba mapa, ano maneni tanur tajung kümdaktsütsü asoshi meranga sayutsü Col. Rahul-isa tesayurtem ajungmeso.

Iba school ya tenzüker taküm agi küm 28 buba arur, iba school ni agir ita 9 shi dang arur. Tang tashi nung yangi kaketshir 140 shi lir aser kaketshirtemji Changtongya area nungi dang masü Longleng district nungia kaketshir 30 shi lir. Iba school nung pre-nursery nungi tenzüka class 10 tashi lir aser tetsür tebur atema hostel facility agütsür, ta St. John's School Changtongya, kibur, Takowati-i osangbenertem den sensaksem dang metetdaktsü.

Tanü alima ya computer putu kümogo, anungji, iba school nung azünger kaketshir shia nem computer theory den practical angazükdaktsü nükjidong nung tanü iba lab ya amenloker aser ibai angati

angazükdaktsütsü, ta pai ashi.

Paisa tarutsü nung inyaka aotsü pa mangdang kar lemsatepdang, iba school ya Central Board of Secondary Education kübok higher secondary jenjang nung ajangketa Science aser Arts stream amenloknür. Changtongya area nung CBSE kübok school kata mali, anungji, iba area sanger atema dang masü temeket alirtem nem education tajung agütsütsü pa mangdang lir, ta paisa shisem. Iba tesem ya semi-urban ka dang asünung fees-temjia tangalen meshiba ama memeshiteter, iba ya mission school ka amai dang anepalua arudar, ta paisa ashi. Iba school temeket ya tzü mopung tajung, meta penzütsü jangratemsü, school kima ground tulu lir, tajemtsü tzü talubusa aser tesayur ajak training agir tesa.

Tanü iba sentong nung SJS Principal - Subrata Baruah, Akhoya Village Council Chairman - Tiatenjen, yimsüsür M.T Among, yimsüsür K. Mangyang, SJS Headmistress - Chubakokla Lkr parnoki shilem balala agi. School tanurtemi school anthem aten. Iba sentong nung tesayur Aküminla menden liasü. Jangratemsü kaji tanü 12 AR-i achayanga kaketshirtem atema Army jangrartem atema lenmang sayuba sentong ka ayongzüka katsü.

Master Colony nung angati health camp ka ayongzüka agi

Dimapur, Rongjui/September 9 (TYO): JCI Dimapur tentetertemi JCI hopta amungba nüngdem nung September 9 nü Master Colony nung angati medical camp ka ayongzüka katsüogo. Master Colony ya Dimapur kübok tekübokba jenjang nung aliba kiyong ka lir.

Tsüngküm mongpu melenshiba ajanga tetsürtem aika gynaecological issues balala agi kangshitepdar aser iba ya temulungdang yur camp asoshi Dr. Mhasisen T Belho (MBBS, DNB) jaoka liasü.

Camp nung Dr. N Yanger

Aier (MBBS)-i viral infections aser tanga generic tashidaktem anepalua liasü.

Ajak senteper doctor temi patient noklangka shi temang tendanga liasü.

Parnokisa patient tem nem tenüngdakba supplement tem aser angati mozü agüja liasü.

Iba camp ya HGF tir, Mridula Agarwal, Secretary JC Ayushi Agarwal, Treasurer aser Project mendenbuba HGF Meena Sethi nungeri achaayanga liasü.

JCI züngsemtem ajaki iba sentong nung shilem agiogo aser nüburttem ajak tenüngdakba mozütem bener meyipa yokogo.

65buba DGC Freshers Meet mungogo



Dimapur, Rongjui/September 9 (TYO): 56buba Dimapur Government College Annual Freshers' Meet, September 8 nü college auditorium nung mungogo. Iba sentong ya "Persistence over Perfection" omen nung ajemdaker agia liasü.

Sentong nung alakteta jaoker East West Logistics, Kikonic Tech, Kley Enterprise & Kohima Lead Generation Centre ngutetsang Yanpvuo Kikon liasü. Pai, pa taküm nung tajangshibatem idang lemsatepba, kaketshir, faculty aser tejaokertem ajunshia liasü. Paisa, tetemsü akümtsü asoshi masü saka renlokyonga aotsü asoshi inyaktüsü, ta ashiba den alima nung company tem indang tatishitsü bener arua jemb, shirnok renloka aotsü merangba ajanga mesamai tejakdangio.

Sentong ajak rongnung tongtibangibaji Mr & Miss Fresher shimba sentong ya liasü. Iba tetoktepba nung shilem agirtem round pezü tashi toktepba sülen takoker shima

liasü. Tetoktepba atema tetendangertem rongnung Logan Jeke Tamin (freelance model, fashion choreographer, Miss Si Donyi organization Show Director aser beauty pageants 4 tashi koker alila), Linovi P Kiba (Reigning Miss Sumi, 1st runners up 2022 aser Queen of Hearts, Miss Nagaland 2022) aser KL Pamei (kentener aser ken mejemer) nunger densema liasü.

56buba Freshers' Meet 2023 nung takok angurtem

1. Anando Nayak - Mr. Fresher
2. Phangmei M Konyak: Miss Fresher & Miss Talent
3. Hannyantoba Chang: Mr Talent & Mr Perfect
4. Denja P Hoichem: Miss Perfect

Freshers' Meet sentong nung Dimapur Government College kaketshirtemi kentemba, saya balala aser o jembiba nung shilem agia liasü. Maneni sentong nung principal Prof. Sanjay Sharma-i lokti pela agizükba o jembiba liasü.

'New Delhi Declaration' agizükogo; G20 nung telemtetba agiogo: PM



September 09, 2023 nü New Delhi nung G20 senden aliba mapang (abelen nungi) World Bank Tir Ajay Banga, Brazil Tir Luiz Inacio Lula da Silva, India Ato kilonser Narendra Modi, South Africa Tir Cyril Ramaphosa aser US Tir, Joe Biden nunger tangokba noksa nung angur.

New Delhi, Rongjui/ September 09 (Agencies): Honibarnü New Delhi nung G20 senden tenzükba anogo nung Ato kilonser, Narendra Modi-i 'New Delhi Leaders' Declaration' agizükba posang metetdaksüogo.

Tang Ukraine linük nung rara dak sendakba nung G20 züngsem linüktem tsüngda tangatetba balala lia 'New Delhi Leaders' Declaration' sangdongba ya alizüng ka tongtetba ama züngshir.

Ato kilonser Modi-i, "Ozü team-i nendaka inyakba ajanga 'New Delhi G20 Leaders' Summit Declaration takok ngua agitetogo," ta metetdaksü.

'New Delhi Leaders' Declaration' okilaji- 1. Asenok Alima Ka, Kibong Ka aser Tarutsü Ka; iba osang ajanga telongjem aser kasa khuret osang sangdonger. Tongmelang agi, iba tetezü alima nung nisung ajak sendaktepa dang lir, aser ibaji kibong ka dang mesük, aser asenok ajak tarutsü atema kasa tia lir. Iba sangdong ajanga alimai longjemer inyaktsü aser asen aliba lima ajungtsü atema alima nung alirtemi longjemer kasa khuret bena amalitepa inyaktsüla. Iba sangdong ajanga alima nung tayongzükba balala koktettsü bentettsü atema longjemer inyaktsü aser ajak atema tarutsü tia tajungba akümtsü atema inyaktsü ayongzükur.

September 9-10 anogotem nung G20 lenirtem 'Vasudhaiva

Kutumbakam' omen nung ajemdaker senden amener. Iba ya asenok aliba lima nung tesünep alitsü aser alima nung tayongzükba balala atema telemtetba agia inyaktsü atema lir.

2. Alimai mera agitsü atema G20 amalitepa inyaktsü nüngdak. Alima nung rongsenketzüng aser yimjung alitsü atema inyaktsü.

3. Iba senden nung lenirtemi tarutsü tia tajungba yangertsü atema parnok asoshi maongka lir ta lemtet. Energy tsütsü temelenshi ajanga mapa maongka aser libaliro tajungba akümtsü aser rongsenketzüng tashi itshitsü. Linük kati danga sensak tia anema raratsü aser alima wazüka ayutsü atema inyaktsü tsüngda tebandang malitsüla.

G20 lenirtemi agiba tenangzükba kar:

Lenirtemi '2030 Agenda for Sustainable Development' mapa kuma inyaktsü bangjem.

Parnokisa terenlok aser climate change tsütsü tayongzükbatem atema asalentong yanglua inyaktsü, Lifestyles for Sustainable Development (LiFE) ajungkettsütsü aser süngdonglidong den arem shiruru, arem aser molutzü (ocean) wazüka ayutsü bangjem.

Tarutsü nung health emergencies atema renema alitsü asoshi medical jenjang ajungkettsütsü aser terenlokdak linüktem nung supplies aser production ajungkettsütsü atema

bangjem. Sustainable Development Goals (SDGs) keraa renloktüsü atema parnoki lenmang balala nungi senotsü bendena inyaktsü bangjem.

Paris Agreement kübok nükjidong balala atongtsü atema tali temerangba inyaktsü aser senotsü tali lemzüktütsü parnoki bangjem.

Alima nung tayongzükba balala koktettsü atema inyakyim tasen benoktsü bangjem.

Tetsür-tebur tebandang kecha malitsü atema telemtetba agiba aser rongsenketzüng nung tetsürtem züngoka shilem agidaktsüba ajungkettsütsü parnoki bangjem.

"Item mapatong teinyakdak mapang linüktemi alima nung tebilemtsü onük balala atema inyaktettsü, nisung ajak ajungtsü, tesem ajaklen azükuru alitsü aser meimchir ajak ajungtsü atema onoki inyakyim ka renemdar," ta declaration nungji shia lir.

Ano külen tanga osang ka nung, Honibarnü züngsem 55 aliba African Union-a G20 nung Permanent züngsem kümogo.

Regional organization nungi G20 züngsem akümba mezüngbubaji European Union lir aser tang African Union-a Permanent züngsem akümer.

Iba sangdong agütsüba sülen Ato kilonser, Narendra Modi-i African Union Chairperson, Azali Assoumani pelaa agizük aser pa nem conference table ka agütsü.

KIBUBA DANGI OOR KÜM 1 AJUNGBA BILEMTETER



BENJONGBENLA LONGKUMTSÜR
15TH DEC 1938 - 10TH SEP 2022

Temeim oja, Nai onok toktsür oor küm ka ajunger, Saka Onok mulungjang nungi na kodanga mepilar. Ne TamangSarasatem, shisatsü, temeim aser menürem jakden onoki Mamateter. Nai inyakba mapa tajung tem bilemteta tanü onoki ne nem tenünsang agüja sarasatema amonger.

Nai akümlidang inyakba mapa tajungtem kodanga Mesamatsü. Na meliaka ne tawabangba akhüm kübok onok teti alir. Na teti tatem makadak tesünep nung aliba meteta onokmulung süngzükur.

- Kodanga amadoktsü makokba Temeim Kinungbo, Chirnur, Semchir aser Sosemtangsem.

OFFICE OF THE
CHUCHUYIMPANG SENSO MUNG DANG
(Chuchuyimpang Citizens' Conference)
HQ- CHUCHUYIMPANG, DIST : MOKOKCHIUNG
NAGALAND - 798601

TENÜNSANG AGÜTSÜR



Chuchuyimpang Senso Mungdang aser Riongsanger Putu Tatar Menden nati sensopurtem tenung nung kanga tenünsanga aser nema danga teküboklen agüja aliba senso tajungtem nem parnok takok tajung aser yimer nem konang tetushi bener arutsüba atema tenünsang agütsür.

1. Limawati aser Temjenmongla Jamir na jabaso **Er. Moasanen Imsong**-i NPSC tatidang ajanga P&AR department kübok EAC candidate tem ronung 4buba jenjang ngutetogo.
 2. N Among Imsong aser Chubazungla Senpo na jabaso **Imowapang**-i NSSB ajanga LDA Cum Computer Assistant mapa ngutetogo.
- Tarutsü nunga tena wadang temoatsü ma nung aotsü atema tulusang Tsüngremi maneni moatsütsü ta timla aser tamang nung sarasadema atar.

Sd/-
Wb. Temsumoa,
Chairman,
Chuchuyimpang Village Council.

Sd/-
Wb. Nukshimoo,
Tir,
Chuchuyimpang Senso Mungdang.

Ainertem dang India atangji noksa mimshitsü menüngdak: Congress

New Delhi, Rongjui/ September 09 (Agencies): Honibarnü Congress party-i New Delhi nung G20 senden atema sorkari sensakertem aliba tesem (slums) mimbangba aser kibur maliba shiruru mimbangba atema aitsüogo.

Congress general secretary, Jairam Ramesh-i sangdong ka ajanga, "G20 senden ya alima nung rongsenketzüng tulu aliba linüktemi alima nung tebilemtsü onük balala atema amalitepa inyaktsü nükjidong nung ayongzükba senden lir. (Russia) Tir Putin senden nung maden, saka Prince Potemkin bo (taila nung atishai jembiba nisung ka) jungjunga sayaogo, sensakertem aliba tesemtem mimbang mesüra raksatsü, aser ibaji ajanga nisung meyirjang aika talidak makai kümogo. Kibur mali nemzüba shirurutem dang taochi mesayui apu aser tim mesüi beshi, aser item ajakji Ato

kilonser noksa wangshidaktsütsü atema dang liasü," ta aitsü.

Congress party-isa 'slums' mimbangba video sayaba den külemi kibur maliba azü aser tanga shirurutem dang tim mesüi beshiba video aika lemsatep.

Ano külen party lenir, Rahul Gandhi-ia, asen ainertem dang India nunger atangji noksa mimshitsü menüngdak, ta metetdaksü.

Rahul Gandhi-i X ajanga, "India sorkari asen nübur sensakertem aser shirurutem mimbanga ayur. Asen ainertem dang India atangji noksa mimshitsü menüngdak," ta metetdaksü.

September 9-10 anogotem nung New Delhi nung G20 senden amentsü anogo ishika jaddang sü tanen sentsü agi slum tesem mimbangba video aika social media nung prokshio.



September 09, 2023 nü New Delhi nung US Tir, Joe Biden-i US Embassy staff tem aser parnok kibongtem ajurudang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 10, 2023

Na kong lir?

Na kong lir? ta asüba o ya asenoki anogoshia bangpet süa asüngdanga jembiba o ka lir. Na kong lir? ta asüba o ya asenoki tanü asüngang jembir masü saka temeshi laishiba nunga reprangdangra Lipok kaket nungji kasa o ya shia angur, ibai alemli Adam aser Eva-la nunger mapang nungi jembia aruba o ka lir. Ibaji yamai: "Nikongtsütsü tenati [Adam aser Eva] Kibuba Tsüngrem atsüki nung jajaba angashi aser tenati Pa tsüngdang nungi atsüki süngdongzüng nung atsüka ali. Saka Kibuba Tsüngremi nisung dang jaa ashi, 'Na kong lir?' Lipok 3:8 - 9. Kechiba Tsüngremi nisung bushi? ta sürabang, Paji temeim agi sünga aliba Tsüngrem asüba ajanga lir. Pai memeim asübo 'Na kong lir?' ta ya masüngdangba, tetezü pai meimchirji mebushila. Tsüngremi nisung shinga sendoka mali. Pa tsüngdang takar sensaker, tular tilar, tetsür tebur, tanur tain ajak kasa. Pai meimchir ajak sakuku meimer. Tsüngremi temeshi nisung koda meimer kasaji ano temenenpur danga meimer. Pai meimchir shinga temenen nung mesamadaktsüner. Pa tsüngdang tanela ajakji senti lir. Iba jagi, Tsüngremi nisung shinga mesamadaktsünüba ajanga "Na kong lir?" ta asüngdanga tsüngdong bushia aru. Aji oda süaka, alima meimchir ya anogoshia iba lima nung tia balala ajurua liyonga aodang memeteti aiben tatidang nung tsüker aser Tsüngrem nungi pilaadoker alir. Asenok taküm ya kodang Tsüngrem nungi tera pilar lidir, mesüra asen kibong telung nung temeim tera mokonga kümer lira, mesüra azümesen nem kokdaktsür sarasademtsü mejangrai lira, idangji temenen mojingji asen taküm aser kibong telungi aita atidangtsü renema lir ta metettsüla. Iba denji ano, asenok azümesen nem kokdaktsür sentepi aotsü mejangrai tanela nung azülar alidangbo mojing tatidang nungji melamela tsüktsü. Asen mapa nem kokdaktsür Temeshi laishiba azüngtsü mapang makai alidang yakta mojingi chance agiadoktsü. Ano kibong nung, telok nung aser medemer tsüngda nung tesendaktep aser temeimtep samar alidang temenen nem yakta mesüzükdaktsütsü. Tememen mojing ya kanga shisa taka, pai mapang ajak nung meimchirji mesüzüka temenen nung tsükdaktsütsü lenmang dang bushia alir. Anungji mapang ajak nung asenok atidangtsü asoshi mojingji asenok sülen lir ta metettsüla. Aji oda shia aru ama, mojingji kanga shisa taka asünungji pai asenok tenla kidang alidang mesüra laishiba zünga sarasadema alidangbo matidangtsü. Saka pai asenok kija azüngmeyaka alidang aser tia balala nung alidangang atidangtsü. Temenen tatidang ta asübaji tekolak nung tezü talangka dener, tepu küpteter, ku waar asenok dangi marutsü. Saka asenoki meimba mesüra sabuba langka agi pai atidangtsü. Idangji asenok tamang mita melira tenük maseshpi nung temenen nungji tsükadoker alitsü. Anungji mapang ajak nung asenok tamang mita aser Tsüngrem den tesendaktep shitak alitsübaji tongtibang. Longben ya tesempatsüka, saka temenen jagi tobur tajung shinü dang sayutsü. Idangji asenok saksalema melira memeteti mojing nemji mesüzükdaktsür alitsü. Alima nung temenen tatidang nung metsüker mali, saka nisung aikati temenen nung tsüker külen Tsüngrem bushitsü melena Pa nungi talangba talangba dang jena aor. Temenen nung tsükadoker Tsüngrem nungi jena aotsü merangaka tejenokdakji kodanga mangutsü. Shibai aji mangatetdir pa/la takümji ayatai nung tembangtsü. Kechiaser Pa tsüngdang nungi jena aotsü makok. Laishiba nung yamai shia lir - "O Kibuba, Ne tanela nungi ni koloni aotsü? Mesüra ne tsüngdang nungi ni koloni aotsü? Ni anüng temaleni tura, na yangji lir: Kü yipten Sheol nung yanglura, ajiang na yangji lir. Ni anepdang tashikang tener, aser tzüyim tatembang nung oa lira; Oda idakjia ne teka agi ni anitsü, aser ne teka tajichi agi ni amettsü..." T. Ken 139:7-10. Pa dak alema shinga mali, alima meimchir shinga mesamadaktsütsü asoshi Pai anogoshia asenok bushia kishizüng nung akokshia "Na Kong Lir?" ta asüngdang. Tsüngremi meimchir bushibaji temenen nung taküm mesamadaktsüi küm meyrirjangsa meyrirjang aika tepela nung Pa den alitsü asoshi tekümtet agütsütsü bushir. Anungji Pai 'Na kong lir?' ta bushia arudang jena aotsü memerangi asenoki yakta 'ni yangi lir' ta langzütettsüa anogoshia asen taküm renema alitsüla.

OLEMSABANG

KHRISTA DAK AMANGERTEM ASOSHI TONGTIPANG ONÜK MEPET LANGPANG ANA ASER MI

~ Süpongñüsang Longkümer,
Darogapathar Dimapur

Ni sarasatema lemsatepnüba onük ana ya Ni zülunütsü zülutsü onük masü kechaser ibai temishipur aser temenenpur ajak atema Tsüngrem sentong mapang aser mapa tulu lir. Anungji shibaisa iba onük jembitir jungjunga angatetter külen jembis mesüra tangashir ajak aipelendaktsütsü anasa lir ta angatetter.

Tayimtsü nung alima talangi ole arule ta jaja tang mepet ajak atena atur aser reprangzüka yok nung alima nungi mepet koma tur angur yamaji temalen nungia mepet ya talangka lur angur ta tayimtsü nung senzürtem jembiasa angazüker. mepet nung tsüngmok tesüngmangtsüka atenloktsür, iba mepet nungi tsüngpert alima ajak sangwaja pertloktsür, aser iba mepet nungi tsüngi ailoktsüba agi süngtong ajasatsür, aser nisung, shiruru samatsür aser tsünglu agi alima metsüngbanger raksatsür. Iba mepet ajanga Tsüngremi tesüngmangtsü mapa inyaker. Israel nunger jakdang mepet tongshi aser Mi tongshi agi aniba angashijen angashir aji mamae liti, Karmel tenem nung Elija aser Baal ainketer mi agi doktep itangji Eljai amangba Tsüngremi kotak nungi mi yoka kilentzü ajak nung tzü menakrepa arongba 1 chub 18:38- 40 nung angur. Tsüngrem sentsüwangshi agi Yirusalem ajongkettsüba cherubim ki takdang mepet agi asüngba angur. Ezekiel 10 :3,4 Tsüngremi pa mapang tong ka nung alima lendongtem nungi temeshipur khen atema akina atatsü. Yisui nütsüngtem dang sarasatemtsü sayuba nung Oba, nü nung temeshi sang, nü yimli arung; Laishiri ashiba agi temeshipurtem timtem marem tang Tsüngrem jazükba ta ashir Luk 11:3 kechiyong washiba agi, tamarenba kotak tenyar ola agi aser Tsüngrem jangzü ola agi kibuba bei sasa kotak nungi arutsü; aser khrista nung asürtem tamasa shia arutsü. Idangji asenok anünga taküm alirtem anüng nung Kibuba den ajuruteptsüaser parnok den külemi mepet nung ayipba atatsü. Iba olen yagi angatetdaktsür. Temeshipur ayipba tukaji temulung meyiptsü aji tatepang. Ni nenok dang shitipaonungji yipden ka nung nisung ana alitsü ka anitsü ka doktsütsü, Tetsür ana semki ka nung tsük senya alitsü ka anitsü ka doktsütsü, Nisung ana alu nung alitsü ka anitsü ka doktsütsü doktüsü Luk 17:34,35 Aour mapa ama mesayur, aonung asütsü, asü anepdang asütsü, mesüra nikong dang asütsü memetet, iba amaji anir aortemi doktsür aortem dang parnok aoba mashi, doktsür aortemi metemer taoba memetet. Tetezü aour mapa amajisa aser doktsür aortem jagi jangzü olaji mangashe. Aji agi sayur tenük shia agi mangu. Yisu kotaki atutang tenyar terana dak alaka shingai manguba ama, temeshipur mepet langpang nung Yisu den kotaki atubaji temeshipurtemi tang metetta liasü ta Lai jagi angatetdaktsür. Aji mezüngpuba mepet Math 24 : 40.41.

Alima kintemi Yirusalem makdoktsü meketbangtsü aser parnoki akoker ama alitang; Anungji Daniel ainkar ajanga jembiba tesüngmangtsü tetsüputsü kodang nenoki temeshidak nokdaka ngudir shibai azünger pai angatettang. Mth 24: 15 Saka item timtem tekangshi anügotem temlei, Anü manga adoktsü Itai bei tesangwa magütsütsü aser anüng tashetem anokshitsüidangji anüng nung nisung chir temaitsü adoktsü, aser idangji alima kin ajaki teko nung tsünga ajepsü aser parnoki Nisung chir anüng mepet nung ain aser sentsüwangshi tulu nung aruba angutsü aser jangzü ola tulu agi Pai bei tenyaritem yoktsü aser parnoki anüng tatem külen nungi külen tashi kinük pezü sülen nungi bei teshimtetpurtem anitentsü. Mepet nung ayipba aortem Yisü den küm meyika yimsü asütsü arutsü Mth 24:29-31. Pai asenok chuba yimli ka kümdaktsü aser bei tebo Tsüngrem atema potir kümdaktsü, pa tang sentsüwangshi aser yimsüsüba teti tatem maka sang Amen. Ajiang Pa mepet nung arur, aser tenük shiai aser shirnoki Pa dak atsüng parnoki Pa angutsü aser kin ajaki Pa asoshi mang ayimtsü. Ibai tanapuba mepet nung Yirusalemi aruba alitsü JA 1: 6,7

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Yisui nükpoker ka aneptsüba Silom tzütu nung jenjang kar ngutetogo



Isreal nung archaeologist tem Silom tzütu nung mapa teinyakdak mapang tangokba noksa nung angur.

September 09, 2023: Tawa Israel nung archaeologist temi Yisu Khristai nükpoker ka aneptsüba Silom tzütu nung jenjang (steps) 8 ngutetogo, aser ibaji ajanga tang mezüng archaeologist temi Yisu Khrista, nükpoker ka aser Laishiba nung aliba tetsür kati jajaba lung bushitetsü, ta Israel Antiquities Authority (IAA)-i metetdaksü.

Tasen Lai nung tasodang nungi nükpoker ka Yisu Khristai aneptsüba otsü ya Yohan 9:1-11 nung shia lir. Iba Lai nung Yisui ali nung metzü metsü aser lishi yanglua ibaji nükpoker tenük nungji inoktsü. Iba sülen Yisui pa dang, oang aser Silom tzütu nung shidokang ta ashi. Ajioda nükpokersang jagi yamaji inyak nung tenük lapokadok aser angu.

Yaküm Israel Antiquities

Authority (IAA), Israel National Parks Authority aser City of David Foundation-i iba project sangdonga liasü.

Iba project kübok Dawid yimti nung tesem ka aser Jerusalem Walls National Park area nung ali tua bushisingdangba densema lir.

Silom tzütu ya küm 2,700 tejaklen Hezekiah Chubai (2 Chubatem 20:20) yimsüsüba mapang atuba lir, aser iba tzütu nung amentsü aser tzü telungi aitsü melaa liasü.

Iba tzütu tanaben yanglushitsü lia 600 B.C. nung Babylon nungeri iba tzütu raksaja liasü.

Küm 2,000 tejaklen Yisu Khristai nükpoker ka tenük lapoktsüba aser Yihuda nunger meshitetsü atema tzü chigoba Silom tzütu atuba osang ya

yaküm IAA-i metetdakja liasü.

"Dawid yimti, Yirusalem nung Silom tzütu ya putiotsü, linük aser alima atema kanga tongtibang temaitsü ka lir. Küm aika sülen onoki iba tongtibang tesem ya tua bushisingdangtsü aser küm shia Yirusalem semdang nisung million aikati iba tesem reprangtetsü," ta Jerusalem Mayor, Moshe Lion-i sangdong ka nung metetdakja liasü.

Gihon ayong nungi tzü mesür arua Silom tzütu nung bendena liasü aser ali telunglen ongken ajanga tzüji yimti tesem balalai belena liasü.

Iba mapang nungji iba tzütu ya temeshi aini aoertemi Dawid yimti nung tekülem kidangi maodang 'mikveh' (tekülem dak sendakba tzü chigoba) ama amshia liasü.

Khristan lenirtemi nübur ajak ajungtsü atema inyaktsü akhanger

September 09, 2023: Lutheran World Federation (LWF) General Secretary, Rev. Dr Anne Burghardt densema alima nung alima nung Khristan organisation balala nungi lenirtemi G20 lenirtem dang New International Financial & Economic Architecture (NIFEA) atema inyaktsüla, ibaji ajanga dang ochishir aser yimjung meimertem adokba den külemi loktiliba nung azükaru alitsü, ta metetdaksü.

LWF den World Council of Churches, World Communion of Reformed Churches, World Methodist Council aser Council for World Mission nungi tongti lenirtemi shidi ka ajanga G20 lenirtem dang, "Loktiliba

ajungtsü mesüra alima ajungtsü dang nungibo rongsen tongti kümdaktsüba lima ka nung asenok alir," ta metetdaksü.

New Delhi nung ayongzükbka G20 senden omenji 'Alima ka, kibong ka aser tarutsü ka' lir, ta shia Khristan organization balala nungi lenirtemi, "Senotsü tajangzük angutsü atema alima ya oset ka ama dang kümdaktsüogo aser alima ya jana tzü indokba ama züngshir. Rongsen agi senskertem dang nungibo takartem ang sapur aser ibaji ajanga loktiliba nung telemsa adokogo aser democratic rejutem dak tamang mekateter," ta metetdaksü.

Kasa shidi ajanga alima

nung takar linüktem (G20 züngsem linüktem) nungi lenirtem dang international tax convention ka alitsü aser climate change nokdangtsü atema carbon aser pollution tax anentsü bendenloksema rongsenkettzüng inyakyim tasen ka benoktsü mepishi.

Khristan organizations nungi lenirtemisa tetsürtem nem shisaliok agütsütsü, training aser healthcare agütsütsü mepishi.

Tatemsä parnoki G20 lenirtem dang alima nung tekübokba jenjang nung alirtem taküm jenjang tajungba akümtsü aser asen aliba lima kümzüksü atema tongti süa inyaktsü mepishi.



2023 küm January ita nungi August ita tashi nung India kübok state 23 nung Khristanem anema inyakba tatalokba 525 lir, ta Delhi nung aliba United Christian Forum (UCF)-i report ka ajanga metetdaksü. Iba ya 2022 küm piyong nung Khristanem anema inyakba tatalokba den teimba lir, ta UCF-isa metetdaksü.

ANOGO ABEN TSÜNGREM DEN

TEMENEN TAKÜM TOKTSÜTSÜ

"Kü dang Kibuba ta ajar...kübui mulungba ama inyakdi..." Mathi 7:21.

Lipok 19 nungji meimchir noksa tajung ka sayua angur.

Kodang Tsüngremi Lot dang ne taküm asoshi jenang, nai lepa tesülen tereprang aser lenten li nunga tanen, na mesamatsüsa tenemi jenang ta ashi. Saka Loti langzu "ni tenemi ajentsü makok, oagi yimti ka nungjiang ni jenokdakjang kechiaser aji anaba lir."

Kodang Tsüngremi asenok dang asen temenen taküm aser mapatem toktsütsü jadiri, aiben asenoki nungnanger mesüra iba yabo meinyakli, iba jagibo moli ta atsüayonger.

Aiben asenoki Tsüngrem dang ya inyakdi, iba jagi odi, ozü moajang ta ozüng agütsür aser Pa ashi mangar. Shin O kati ashir, Tsüngremi Pa sentong ataloktsü asoshi, asen sentong tamakok aludaktsür kechiaser asenoki tanü repranga asüng asoshi asalentong yanglur, saka Tsüngremibo asüngji ngur tanü asoshi asameyanger. Anungji Tsüngrem dang ozü asoshi sentong kechi lir, nai kechi inyakdaksüner ta asüngdanga, tashi anga Tsüngremi mulungba inyaker ka ka küma kotak yimliji ajangzükdi.

SARASADEM:

O Tsüngrem, Ne tashi angatsü kü dang sayuang. Amen

India nung Khristan putirtemi G20 dang nübur ajak asoshi inyaktsü mepishi

September 09, 2023: India külem tayongzükbatem den nung Khristan putirtemi linük külem teinyaktsü khuretem lir," nung G20 senden takok ngua ta parnoki metetdaksü.

den külemi iba senden ajanga G20 senden jakdang India alima nung tayongzükbka balala nung yimti 50 shi nung G20 dak atema longjemer inyaktetsü aser nübur ajak, talisa sendakba senden 200 shi meshimejungertem aser nung yimti 50 shi nung G20 dak aser minorites atema inyaktsü imlar, mengo.

ta metetdaksü. CBCI Secretary General, Felix Machado-i, "G20 senden nung nübur ajak ajungtsü atema tongtibangba ser telemtetbatem agitsüla, talisa tekübokba jenjang nung alirtem aser meshimejungertem taküm jenjang tajungba akümtsüa atema telemtetba agitsüla.

Rongsenkettzüng tsütsü terenlok den külemi loktiliba nung ochi temeden aser ajak ka ajanga, "Ni G20 nung shilem dendaktsütsüji kanga agitsüpur ajak atema tongtibang," ta metetdaksü.

sarasademtsür," ta lemsatep, September 8 nü osangbener den jembidang Mumbai nung amenoka aliba Harmony Foundation nung mendenbubam Abraham shin o nung ajemdaker Khristan Mathai-i, "India nung G20 putirtemi, "Iba senden ya ken o ayongzükbka ya linük atema jembiba aser longjemer akhümket aser maongka lir. Prangpong ola samatsütsü aser adokdaksütsü atema maongka ken o jembiba ajanga dang mangatettep ajak bentetsü lir," ta ashi.

"Nübur telemsa aika liaka atema akhangtsü mapang asenok kibong ka dang aser tongogo," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Saklok

(v) meima ait, aginüa aküm (attracted)

* Tesayuri kü dak kanga **saklok**.

Sako

(n) tsükchir tokolak, mangko (hunted head of an enemy)

* Akhi mapang tsükchir **sako** bener arubaji konang tulu liasü.

OLONG PAITEP # 6631

1			2			3			4	
			5		6		7			
8										
			9							
	10									
									11	12
			13				14			
15						16				

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsönongtsü adokdak - (3)

OLONG PAITEP # 6630 TELANGZÜBA

TIPIEN :

- 1. Teti, 5. Aika, 6. Repsem, 7. Osü,
- 10. Akhüm, 11. Ajuru, 12. Agima,
- 15. Oko, 17. Amajok, 18. Sang,
- 19. Akok.

LANGTSÜNGLEN :

- 1. Taret, 2. Tapet, 3. Komo, 4. Talem,
- 5. Asüku, 8. Saru, 9. Ajak,
- 11. Among, 12. Aitsü, 13. Lijak,
- 14. Takok, 16. Oagi.



Samaro asangur ana, talidak ki maka, ku aser pangsemo pungpanger, chiner, jemner saka maka nung tena rongnung tambusangi ashir :

Tambusang : Na shisa tabulu, ni tasa ka meteta lir, oagi aliba tenlaki jagi parnok tekülem mapang ni aotsü aser ni sayangtsütsü, aser ana party alitsü.

Devotional sentep mapang pai tenlaki jagi ola tulu adoka tur ashir.

"Ni Yisu khrista, ni nenok atema tanaben arur"

Pastor : Deacontem, iba nisung dak teshinem menemer anungji senji amoteter agüjang aser paji odakjang. Iba sülen anogo ishika lalushiponger sen atem.

Tanubosang : Tanbo ni tanga sentep jagi odangdi no. (tanga tenlakidang sentep tiyalong agidang)

Tanubosang : Ni Yisu khrista, ni tanaben nenok kümzüksü arur.

Pastor : Deacontem, yakta dang süng ana angenteper Kangki ka yangluang, kari ai korang ka yangluang, pa mezüng khangshiba toagi temolung masü tanaben arur asüjar.

- Lilir : WhatsApp

KSU-i India nungi Bharat melenshiba magizüker

Shillong, September 9, 2023

(Agencies): Centre sorkari linük tenüng India nungi Bharat melentsüba magizüker ta Khasi Students' Union (KSU)-i metetdaksüogo.

"2024 Lok Sabha elections jaldang Bharatiya Janata Party (BJP)-i iba ya politics mapa ka inyakba lir" ta KSU general secretary Donald V Thabahi ashi.

"India" ta asüba olung ya linük nung alir ajaki meteta lir saka "Bharat" ya Sanskrit olung lir ta pai ashi.

"Nisung temeyoktep aliba linük ka nung kodaser iba ama tenüng melenba agizüksü" ta Thabahi-isa asüngdang.

BJP-i Criminal Procedure Code (CrPC) aser Indian Penal Code (IPC) melena ozüng tasen kar yanglunür, ta paisa ashi.

BJP-i aniba National Democratic Alliance (NDA) sorkari 1947 küm nüjiso anguba mapang nungi amshiba ajak melenshinür. Ajisüaka linük indang federal structure nung mekongshitsüla ta KSU lennirisa ashi.

BJP-i Khasi nunger dena lisopur kintem indang putiotsü tangatetba melenshinünür saka ibaji magizüker ta Thabahi-isa metetdaksü.

KSU-i September 10 nü India nungi Bharat melentsüba onük atema public senden ka ayongogo.

OFFICE OF THE ARTANG WARD EXECUTIVE COMMITTEE

MOKOKCHUNG - 798601, NAGALAND

SANGDONGER

Mr. Lolenmeren (Nepali) Artang Ward H/no 504, pa Artang Ward nung alir sür Penli nung alir ta tiyazü address agütsü aser tenüng menük bener arutsü nung, pa jaoka tapet temerenshi agütsüogo ta sangdonger.

Sd/-
T. Ati Mongro
Chairman.

Sd/-
Obangtoshi Pongen
Secretary.

Manipur cabinet-i Rs 75 crore endoka ki yanglutsü

Imphal, September 9, 2023

(Agencies): Chief Minister N Biren Singh lenisüba kübok Manipur state cabinet senden ka amendang onük 30 shi benoka lemsatop.

"Cabinet senden nung onük 30 shi jembio" ta Information and Public Relations Minister Dr Sapam Ranjan Singh-i ashi.

Onüktem rongnung kin o kin rara nung pei talidak toktsür aotsüsa akümer asoshi permanent houses yanglutsüba dena liasü ta pai ashi.

Permanent housing scheme kübok mepetmesü adokba district ajak nung ki 4806 tashi yanglutsü. Police ajanga ki 4806 raksatsüba mesüra rongdoktsü ta ashir.

"Tensa süngjema alidak mezüngbuba shilem nung ki 1000 yanglutsü. Rs 75 crore

endoka ki yanglutsü. State sorkari pucca house atema Rs 10 lakh, semi pucca atema Rs 7 lakh aser kutcha house atema Rs 5 teyari agütsütsü" ta Minister Dr Sapam-i ashi.

"Senden nungsa kanga mejungi yirurtem, tera yirurtem aser ki rongdoktsürtem nem senotsü aser teyari balala agütsütsü jembio. Manipur state compensation scheme for women victim-survivors of physical assault agizükogo" ta paisa metetdaksü.

August ita CM Biren Singh-i Sajiwa Jail Complex nung Temporary Shelter Homes lapokja liasü.

Item ki ya Scheme for Providing Temporary Shelter to Displaced Families kübok yanglu aser 3000 shelter units yanglua liasü.

Tripura Opposition party temi by-election results magizüker

Agartala, September 9, 2023

(Agencies): Tripura nung opposition political party temi by-election results magizüker. CPIM aser Congress dena opposition-i elections nung tim masüba inyakogo ta aitsür.

"Chief Electoral Officer, Tripura ajanga 20-Boxanagar aser 23-Dhanpur Assembly constituency tem nung by-elections sangdongba ya magizüker kechiyong constituency anaprong nung tim masüba mapa inyakogo" ta Tripura Left Front committee-i ashi.

"Election agiba sülen BJP züngsemtemi polling booths makdokba aser tangalen nungi nisungtem anir arua electoral staff aser police jaldang tim masüba inyakdaksü. Tripura Left Front Committee-i constituency anaprong nung election agishitsü takhangba agütsü saka Election Commission of India-i magizük"

ta parnoki metetdaksü.

"Boxanagar nung BJP candidate-i 89% aser Dhanpur nung BJP candidate-i 71% votes angu. Tripura election putiotsü nung Ramchandraghat Assembly nungi Dasaratha Deb-i votes timtiba ngua takok anguba dak alaka shingaiya yamai votes mengudang" ta Left Front-isa ashi.

"Taküm February ita general election nung CPI(M)-i Boxanagar nung takok angu aser Dhanpur nung votes tera agi dang tamakok angu. Ajisüaka ita trok tsüngda voter temi BJP dangi meyiotsüsa mapa kecha meinyak. Iba mapang tsüngda nübertemi ang sorkar dang mepelai liasü kechiyong sorkari mapa kecha meinyaktsü. Anungji BJP-i police aser civil administration nung nisung kar teyari agir Election Department den yaritepa takok angu" ta Tripura

Left Front Committee-i ashi.

"Opposition CPIM-i by-elections nung parnok jenjang akangshitsüba liasü aser nübertem longjemtsü mapa inyaktsüba liasü. By-election nung tim masüba inyakba anema CPIM-i counting nung maden" ta Pradesh Congress Committee president Asish Kumar Saha-ia ashi.

"BJP sorkar ali tashi parnoki nübor temetentem ajembangtsü aser election ya külen tsütsü shir dang agitsü. BJP-i senotsü nung metaloker election nung takok angutsü meranger. Ajisüaka public taginüba anema inyakba ajanga tarutsü nung parnoki tamakok angutsü. Linük nung sensotemi BJP pusema menungiter aser anogo süiba ama parnok samaa aoer. 2024 Lok Sabha elections nung BJP tamakok angutsü aser INDIA teloktepi takok angutsü" ta Saha-isa ashi.

AR-i Fire Department nem teyari agütsü



Dimapur, Rongjui/ September 9 (TYO): September 9 nü anepdang 4:00 ako meta Kohima kübok High school Junction anasa A V Market nung mi temsepa nung

Assam Rifles-i fire department nem teyari agütsü liasü.

Mi adokba osang angazükba sülen iba tesem anasa aliba Assam Rifles sepaitemi mibendang amshiba

hadirtem aser Water Bowers bener iba tesem tonga ao. Mebenertem den külemi sepaitemi ghonda trokshi mi temseptsü atema meranga inyakba sülen mi temsepteta liasü.

Assam rifles-i mapang shidak nung jenjang tapet agiba ajanga mi mora meyoki taküm aser rongsen tali akoksatsü aliba nokdangtetogo. Assam Rifles-i mapa tajung inyakba atema Kohima nung aliba nüburtemi parnok dang kanga pelaba lemsatopogo.

Morocco nung menoknok tesashi ka anak; nisung 820 süogo



Menoknok anakba sülen Marrakesh nung Honibar anepdang nüburtem ki traksa ka anasa mapa inyakba noksa nung angur.

Rabat, Rongjui/September 9 (Agencies): 6.8 magnitude tesashi kati Morocco anoshitsüba sülen nisung 820 süogo aser tesem aika kanga mejungu raksaogo.

Menoknok indang epicentre ya Marrakesh nungi south-west len km 71 (44 miles) pilar Atlas tenem nung liasü, ta US Geological Survey-i ashi,

Iba menonok ya 23:11 ako nung anak aser iba sülen minute 19 lir 4.9 magnitude aftershock kagi agi kasa tesem kongshia liasü.

Marrakesh aser linük south len nisung aika süogo, ta linük interior ministry-i ashi,

Asürtem ya timba kinük nung aliba tesemtem nung alirtem liasü.

Interior ministry-i ashiba agi, iba menonok lendong nung al-Haouz, Marrakesh, Ouarzazate, Azilal, Chichaoua aser Taroudant provinces aser municipalities nung alirtem süogo aser iba den nisung 600 dak tema yirua liasü.

Nüburtem aika aonung tepeyong kima nundang kazütepogo, kechiyong aftershocks tesashi arunungbo ano lendong tulu adoktsü ta bilema Morocco sorkari parnok dang pei kidangi meyipa maotsü atema tetuyuba agüja liasü.

Marrakesh nung mozükitem yirur alirtemi süngogo aser ketdangsurtemi nüburtem dang azü tenla agütsütsü ayongzükogo.

Osang ajanga ashiba agi, yimti nung nüburtem aika ki chireper aliba nung sabanga lir aser Unesco World heritage Site, Medina-a shilem karbo raksaogo.

Ki karbo chirepogo, ta yimti nung alir kati Reuters news agency dang ashi. X sabang nung lemsatepba video tem nung ki chirepba nguogo.

Marrakesh kübok Kutubiyya mosque indang minaret temeket nunga awi aika longa aliba nguogo. Iba mosque ya alima penzürtemi kanga bulua semdangba tesem ka lir.

Nisung kati ali kanga mejungu anakshiba aser kitem arakzüa anguba indang rasa ashi.

"Nüburtem ajak aoksar mesüngjemteti liasü. Tanurtem jeptepba den tsürapurtema kechiang minyaki aküm," ta Abdelhak El Amrani-i AFP agency dang ashi.

Paisa, power aser phone line tem minute 10 tashi inyaksangshi mesüi liasü.

Menoknok anakba mapang Marrakesh nung alir Fayssal Badour gari ania liasü aser pai ashiba agi, "ni anen aser lendong koda tesashi liasü aji yimdangi arua liasü. Nisung asatepba aser jeptepba maremtetsüsa liasü," ta pai AFP dang ashi.

Iba menoknok ya epicentre nungi km 350 pilar linük yimtiba Rabat aser Casablanca o Essaouira nunga ajangshia liasü.

Epicentre anasa tenem nung aliba yimtsüngtem nung kitem lendong nungi mejenbo alitsü

akok, ajisüaka item yimtsüngtem ya kanga kinük nung lir asünung lendong nung nisung asüba aser yiruba indang jangjatsü asoshi mapang tatsükabo agitsü akok.

British nung osangbener Martin Jay shiba Morocco nung alir pa nüburtem asatepba ola agi sakdaksüba indang lemsatepba liasü.

Pai BBC Radio 4's Today programme dang ashiba agi, "nüburtem timba pei kima moapu mesüra apartment blocks kima mentepa lir, kechiyong tanabuba menoknok agi parnok dak konshitsü ta tsübua bilema liasü. Parnoki menoknok tanabuba ya ghonda ana sülen anoktsü ta takzüker liasü saka Tsüngrem sangdi, kechiyong menoknok tanebenbo manok."

Iba menoknok ya kidanger linük Algeria nunga ajangshio, ajisüaka ketdangsurtemi ashiba agi, menoknok ajanga teraksatsüba kecha bener marutsü aser nisung asüba osanga kecha mali.

Delhi nung G20 summit nung o jembiba mapang India Ato Kilonser Narendra Modi-i ashiba agi, alima kintemi Morocco nem teyari agütsütsü.

Kasa mapang nung Spain Ato Kilonser Pedro Sanchez-ia, Morocco nungertem nongita yariba lemsatepogo. Maneni France tir Emmanuel Macron-ia iba osang angazüka kanga mepelaba lemsatepba den Morocco nem teyari agütsütsü nangzüka liasü.



United Arab Emirates nungi astronaut Sultan Al Neyadi ita trok tashi international space station nung inyaksangshiba sülen alimai meyipa aluogo. Hombar anepdang 8:17 nung SpaxX Dragon Capsule ka nung pa aser tangar astronaut asem Jacksonville, Florida anasa Atlantic tzüyim nung anena liasü.

METETDAKTSÜR

- "North Eastern Region Strengthening Scheme-IX" porjekt kübok Transmission Assets atema Proposed DOCO nungi 31-03-2024 tashi CERC (Conduct of Business) Regulations 1999 aser CERC (Transmission Tariff determination atema Tariff Regulations' 2019 Terms aser Conditions kübok regulation-86 nung temelaba.
- Temalen shisema aliba Transmission system beneficiary temji: (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co.Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board (h) Mumbai Urja Marg Limited
- Tariff Details

Name of the Asset	Asset-1
Schedule DOCO (FR)	30.05.2023
DOCO (Actual)	01.04.2023 (Proposed)
Estimated Completion Cost (Rs in Lakhs)	615.29
Tariff for year 2019-24 (Rs in Lakhs)	
2019-20	-
2020-21	-
2021-22	-
2022-23	-
2023-24	110.51

- Tariff Details determination atema application copy ka iba applicant indang website www.powergrid.in nung agüja lir.
- Application nung tariff determination atema benokba nung tashishiba aser teshidangnuba kar danga lir beneficiary densema nisung mashi kati iba osang sangdongba sülen anogo 30 tsüngda corporate office indang address nung applicant indang copy ka densema Secretary, New Delhi - 110 001 (or other address where the office of the Commission is situated) nung benoktsüla.

S/d
GM (Commercial)

POWER GRID CORPORATION OF INDIA LIMITED
(A Government of India Enterprise)
Registered Office : B-9, Qutab Institutional Area, Katwaria Sarai, New Delhi 110 016
Corporate Office : Saudamini, Plot No.2, Sector-29, Gunugram, Haryana - 122 001
www.powergrid.in, CIN : L4010DL1989GOI038121

A MAHARATNA PSU

Kim-i China aser Russia den tesendaktep akangshitsü nangzük

Pyongyang, Rongjui/September 9 (Agencies): Kim Jong Un-i, paramilitary forces parade ka ayongzüka North Korea kümteter küm 75 ajungba anogomung mungogo aser China aser Russia na den tesendaktep akangshitsü nangzükogo.



Hokolbar aonung ayaterem nung Pyongyang kübok Kim Il Sung Square nung ayongzüka agiba parade nung North Korea lenir yagi shilem agi, kong China aser Russia nung lenirtemia shilem agia liasü, ta Korean Central News Agency (KCNA)-i Honibarnü sangdong ka ajanga metetdaksü.

Iba parade nung tanga mapang ama army-i masü saka linük yimtiba Pyongyang nungi "paramilitary forces"-i shilem agi aser intercontinental ballistic missiles densema linük indang tanga noknütem mesayui liasü, ta state media-isa metetdaksü.

Noksa ajanga uniform semer aliba paramilitary brigade tem, aser tata gari temeremtem nung paramilitary tem mener aliba sayuogo.

South Korea indang Yonhap News Agency-i ashiba agi, sentong nung Kim-i o mejembi aser parade ya civil defence organisation; Worker-Peasant Red Guards-i anir agia liasü. Iba organisation nung züngsem million 5.7 lir.

Kim-i, State Council vice-premier Liu Guozhong-i anir China nung lenirtem den ajurutepba liasü, koba hopta trok tsüngda Beijing nungi temaba jenjang nung aliba lenirtemi North Korea semdangba asütsü. Russia nung diplomat temia iba sentong nung shilem agi aser Russian military song-and-dance ensemble-a iba parade nung shilem agia liasü, ta KCNA-i metetdaksü.

KCNA-i ashiba agi, Kim-i Liu aser tanga China nung lenirtem den parade magi tsüngda ajurutep, kong parnok linük ana

tsüngda lenla balala nung tesendaktep akangshitsü atema sensaksema liasü.

July ita Kim-i Russian Defence Minister Sergei Shoigu aser Chinese Communist Party Politburo züngsem Li Hongzhong nati anir linük ana nungi lenirtem Pyongyang nung ayongzüka agiba military parade tulu ka nung shilem agitsü jaoka liasü, kong linük indang nok nü tesashitem timba saya liasü.

Parade magi tsüngda anogo ka jelia Kim-i Shoigu dang linük indang prangbong injang aser hadir balala sayua liasü aser iba ajanga North Korea-i Russia nem Ukraine rara nung amshitsü atema prangbong injang agütsütsü mulung lir ta temulung melemi bilema liasü.

Kasa mapang nung iba anogomung tenung nung Russia tir Vladimir Putin-i Kim den salem osang lemsatepogo, ta KCNA-i ashi. Putin-i linük ana tsüngda lenla ajak nung tesendaktep atsilangshitsü atema ayongzükogo.

Kim iba ita Putin den ajuruteptsü atema Russia-i aotsü imlar, kong Ukraine rara nung amshitsü atema Russia nem prangbong injang agütsütsü asoshi sensak asemtsü akok.

Maneni North Korea kümteter küm 75 ajungba anogo tir Xi Jinping-a Kim Jong Un dangi call süa pa nem tenüngsang agütsüogo, ta China indang state media sangdong ka ajanga metetdaksü.

Pele-i linük atema goal timtiba indaktsür aliba record Neymar-i ajatetogo



Pele & Neymar (File photo)

Rongjui/September 9, 2023

(Agencies): Brazil nunger football asayatem rongnungi goal timtiba idakja Pele-i record yanglur aliba Neymar-i ajatetogo. 2026 World Cup South America qualifiers nung Bolovia goal 5-1 agi akokba asaya nung goal ana idaktsüba sülen Neymar-i iba otsü tasen yangluogo.

Iba asaya metenzükdang arishi küm 31 tain asayar aser Pele napronglai goal 77 idaktsür liasü aser asaya nung minute 17buba nung Brazil nem penaly metsütsü asoshi maongka agütsüba sülen iba record ya ajatetsü atema Neymar asoshi maongka tajung ka liasü.

Ajisüaka Neymar-i metsüba ball ya Bolivia keeper Guillermo Viscarra-i ayong ayonga nokdanga liasü.

Penalty midaktsütetba sülen minute tenet lir Raphinha-i metsüba ball ka Viscarra-i nokdangar yokba Rodrygo-i idakja Brazil goal ka agi tejakdang aküm.

Asaya tanabuba shilem tenzüker mapang tatsüka tsüngda Raphinha-i Brazil atema tanabuba goal idakja parnok maneni goal ana agi tejakdang aküm.

Asaya nung tasembuba goal ya Rodrygo-i idaktsü aser iba sülen Neymar-i par team asoshi goal pezübuba aser pa asoshi

linük tenung nungi asaya 125buba nung goal 78buba idakja liasü.

Asaya nung Victor Abrego-i Brazil backline ajanga ball bener lua goalkeeper Ederson ajanga ball metsüokja Bolivia asoshi goal ka idaktsü.

Maneni mapang apuloktsür asayaba mapang Raphinha-i agütsüba ball ka Neymar-i idakja parnoki iba asaya goal 5-1 agi ayong ayonga koka liasü.

Arishi küm 31 tain taoba mapang Barcelona nungi asaya alisang ya tawa Paris Saint-Germain nungi Saudi Arabian club Al Hilal-iogo.

Pele shiba arishi küm 82buba nung taoba küm December ita süogo, pai 1957 nungi 1971 küm tsünga Brazil tenüing nungi asaya 92 nung shilem agiba mapang goal 77 idaktsür liasü.

2026 küm United States, Canada aser Mexico nung asayatsü aliba World Cup nungbo team 48 asayatsü aser iba ajanga South America nungi linük ana talila asayatsü asoshi lenmang lapoktsüogo aser team trok indang indanga qualify asütsü.

Linük 10 rongnungi tenetbuba, inter-continental play-off nung shilem agitsü.

Aston Villa forward Coutinho Qatar club Al Duhail nung denogo



Philippe Coutinho

Rongjui/September 9, 2023

(Agencies): Brazil nunger forward Philippe Coutinho Premier League club Aston Villa nungi season ka atema loan nung oa Qatar club Al Duhail nung denogo.

Taoba küm Barcelona nungi loan nung aruba sülen tetenzüklenbo pai kanga junga asaya ajisüaka iba Premier League club nung ya Coutinho atema jenjang makai kümogo.

Arishi küm 31 tain ya loan nung aruba sülen pound million 17 yong Villa nung teti atema aden ajisüaka taoba season nung pai goal ka dang idaktsü aser season tasenba nunga substitute ama anaben dang asaya lir.

Taoba küm August ita Villa-i goal 4-0 agi Everton akokba asaya nung Coutinho hamstring yiru aser iba asaya ya pa asoshi club nung tatembangbuba asaya liasü. Pa meyiru tsüngda season tepeyong asaya ana nung shilem agia liasü.

Premier League transfer window taoba hopta tembangogo, ajisüaka Coutinho Al Duhail nung dentetogo, kechiyong Qatar nung transfer window September 18 nüang tembangtsü.

"Coutinho loan nung oa

season ka tepeyong atema Al Duhail nungi asayatsü tembanga jembishinüba Aston Villa-i jangjatsür," ta club sangdong ka ajanga metetdaktsü.

"Brazil nunger asayar ya 2022 küm January ita mezüing loan nung Villa-i aru aser Manchester United den mezüingbuba asayaba mapang goal ka idakja liasü.

"Pai kanga junga asayaba ajanga pa den teti asoshi tenangzüktepba ka yanglu aser pa club tenüing nungi 43 ben asayaogo aser iba mapang goal trok idaktsüogo," ta club sangdong ajangasa metetdaktsü.

Coutinho ya 2013 nungi 2018 tashi Liverpool nungi asaya aser pa 2018 küm pound million 100 dak tema yong Barcelona nung oa aden.

Ajisüaka Barcelona nungi imlaba ama pai masayatet. Barca nungi asaya 106 nung asayaba mapang pai goal 26 dang idaktsüteta liasü.

Ajisüaka Qatar nung pa asüingsashitsü asoshi maongka lir. Al Duhail puri tesüsubaba Qatari league koka lir aser Coutinho densemba ajanga par team tali tashi taiba akümstü imlar.

US Open: Medvedev aser Djokovic na final asayatsü



Djokovic & Medvedev

Rongjui/September 9, 2023

(Agencies): Hokolbarnü US Open tebur kija asaya semifinal nung Daniil Medvedev-i iba asayamung tesüsabuba koker alisang Carlos Alcaraz koka final-i iogo aser final nung pa Grand Slam 23 koker aliba asayar Novak Djokovic den asayatsü.

Semifinal asaya nung Medvedev-i 7-6 (7/3), 6-1, 3-6, 6-3 agi Alcaraz koka tang agi pongubenbuba Grand Slam final tongtetogo aser Roger Federer sülen küm anabuba atonga US Open akoktsü asoshi Alcaraz-i merandanga aliba nokdangogo.

Medvedev-i tang tashi nung 2021 küm dang US Open koka grand Slam ka koka lir. Iba küm Djokovic-i Grand Slam pezüpronla akoktsü aliba pai nokdanga liasü.

Semifinal asaya mezüingbuba set nung Alcaraz-i Medvedev kanga nongshia

asaya saka tie-break asayaba sülen Medvedev-i asaya akok.

Mezüingbuba set nung Medvedev-i Alcaraz indang serve break asütsü asoshi maongka ka danga mangu ajisüaka tanabuba set nungbo pai asaya amokbanger asayar aser serve nung point ana dang mongutetba den Alcaraz indang serve anaben tashi break süa liasü.

Iba sülen tasembuba set nung Spain nunger asayar yagi game pezübuba nung Medvedev indang serve break süa asaya akok.

Set pezübuba nung Medvedev-i Alcaraz indang serve break süa pa 4-2 agi tejakdang aküm aser asaya 6-3 agi koka liasü.

Kasa asayamung tebur kija asaya semifinal tanga ka nung Novak Djokovic-i unseeded America nunger asayar Ben Shelton straight set nung koka final tongtetogo.

Arishi küm 20 tain Shelton ya taküm iba asayamung nung tamamangtsüka kanga junga asaya liasü saka pa 6-3, 6-2, 7-6 (7/4) agi Djokovic-i tsükdaktsüogo.

Arishi küm 36 tain Djokovic ya Open era nung New York nung teburtem rongnung champion tambusang akümstü merangba mapang ka lir.

Serbia nunger asayar shiba iba asayamung tembangba sülen world number one akümstü, pai tang tashi nung Grand Slam semi-finals 23 nung 22bo koka lir. Pai US Open asemben tashi koka lir aser tesüsa 2018 küm iba asayamung kokogo.

Djokovic dang agi asembenbuba küm ka nung Grand Slam pezüpronla final tongtetogo. Pai, pa indang career nung tang agi pezübenbuba küm ka nung Grand Slam asem akoktsü merangtsü.

Torres aser Pino na Spain team nung züngoksemogo

Rongjui/September 9, 2023

(Agencies): Euro 2024 qualifier atema Cyprus den masayatsü tsüngda wingers Marco Asensio aser Dani Olmo na yiruba ajanga Spain team nung Ferran Torres aser Jeremy Pino na züngoksemba Honibarnü sangdong ka ajanga metetaktüsügo.

Spain-i goal 7-1 agi Georgia akokba asaya nung Asensio aser Olmo na asaya mezüingbuba shilem nung yirur tugua liasü.

Iba asaya nung arishi küm 16 tain Lamine Yamal ya linük nungi asayar tanobusang aser goal idaktsür aküm.

Nations League champions Spain team ya Group A nung tang tanabuba jenjang nung lir

aser parnok Mongolbarnü Granada nung Cyprus den asayatsü.

Tbilisi nung asayaba mapang Paris Saint-Germain winger Asensio tetsüing yiru aser Olmo temekok yirua liasü.

Spanish football federation-i Honibarnü sangdong ka ajanga ashiba agi, tena temang tendangba sülen Cyprus den asayatsü aliba asaya nung asayatsü tamakoktsü ta jangaogo.

Coach Luis de la Fuente-i June ita Nations League final nung Croatia akokba asaya nung Pino asayadakja liasü aser kasa mapang nung Ferran Torres ya tatesa Luis Enrique kübok Spain team nungi 2022 World Cup nung asaya liasü.

BILEMDANGANG

"Aika bilemaka minyakra kecha mataloktsü."